

5. Recordare, Domine, quia Pater meus es : ecce Anima mea nuda est, indue eam virtutibus tuis : ad patrem enim pertinet, nudam pauperulam filiam vestire.

6. Quid volo præter te, Domine, aut quid mihi prodesse omnia sine te? Tu solus sufficis animæ meæ.

7. Quam vani sunt homines : qui te non quærunt; quàm miseri, et avari, quibus tu non sufficis!

8. O si omnium hominum quotquot fuerunt, sunt, et erunt, corda et voluntates solus haberem, ut iis te summè diligerem, unicum bonum meum!

9. In te, Domine, speravi, non confundar in æternum. Et si Angelus de cælo assereret mihi, me projectum esse à facie tuâ, non crederem illi. Et si tu ipse, summe Deus, diceres mihi, ego in æternum te damnavi, nolo audire preces tuas. Ignosce, Domine, in hac re non crederem tibi : sed etiam si occidas me, et in inferno demergas me, semper in te sperabo.

10. Da mihi, Domine, vulnera tua : abhorreo enim videre cor meum, nisi vulneribus plenum, cum te adeò crudeliter pro me videam crucifixum. Non possum vivere sine vulnere, cum te undique videam vulneratum.

CAPUT XIII.

SUSIRIA AMANTIS ANIME PRO PERFECTIS.

Perfectos appello, non ex omni parte : quis enim in hoc mundo? Imò, ut verissimè scribit Bernardus Drogoni Monacho : *Nemo perfectus est, qui perfectior esse non appetit; et in eo quisque perfectiorem se probat, quòd ad majorem tendit perfectionem.* Perfectos igitur voco, expurgatos à peccatis, ornatos virtutibus, qui in humilitate et charitate magnos jam progressus fecerunt, et ad intimam cum Deo unionem ferventi affectu aspirant. Quia verò perfectio in amore Dei consistit, motus analogici ad Perfectorum statum pertinentes, ex amore potissimum desumuntur, ut ex subjectis formulis apparet.

DECAS I.

1. O dulcedo cordis mei, ô vita animæ meæ, ô essentia essentiæ meæ, et jucunda requies spiritus mei, abstrahe me ab omnibus creaturis, ut solùm requiescam in te.

2. O Domine Deus meus, spes mea et refugium meum, ô dilecte votorum meorum, quando omnem dissimilitudinem et imperfectionem absumes in me?

3. O charorum omnium charissime, ô sponse floride, sponse melliflue, quando me ornabis illis monilibus, quibus tibi placebo?

4. Trahe me post te, sponse dulcissime, ut ala-

riter, purè, perseveranter curram in odorem unguentorum tuorum.

5. Effice me hominem secundum cor tuum, præpara tibi in me gratam habitationem, ut ad me venias, et mansionem apud me facias.

6. Inebria me vino charitatis tuæ, ô pulcherrime amator meus, uni me tibi intimè, et me totum transmuta in te.

7. O ignis increate, quando me totum incremabis flamma ardentissima amoris tui? quando precepta in me omni proprietate totus tuus ero?

8. O dilecte mi, quem solum quæro, quando mihi pulsanti, et gementi aperies? quando teipsum mihi manifestabis, et dices, salus tua ego sum?

9. O immensa dulcedo mea, quando me totum in te rapiens, absorbabis, et abscondes? Quod enim est mari absorbere unam guttam, hoc tibi est absorbere me.

10. O felicitas mea, ô totum et solum gaudium meum, quando sublatis omnibus impedimentis introduces me in cubiculum gloriæ tuæ, et me tibi inseparabiliter agglutinabis?

DECAS II.

1. Quæsi vultum tuum, vultum tuum, Domine, requiram: frustra enim laboro, quamdiu te non quæro.

2. Nolo te sequi, Domine, per viam consolationum, et delectationum; sed veri et puri amoris. Nolo id quod egreditur à te, sed te ipsum solum. Te solum volo, te solum desidero: nihil mihi extra te.

3. In te, Domine, est omne esse meum, omnis delectatio mea, omne bonum meum: Si quid meum dico, si meipsum nomino, te solum intelligo, qui solus meus es, et omnis essentia mea in te est.

4. Anima mea sicut terra sine aqua tibi: effunde ergo, clementissime Deus, largam super me benedictionem de rore cœli, et de pinguedine terræ viventium.

5. Utinam dirumperes cœlos, et ad me descenderes, ut durities mea liquefacta deflueret, et amore tuo totus ignitus inerrabilibus te gemitibus invocarem.

6. Heu mihi, quia incolatus meus prolongatus est, et cogor ibi vivere, unde mallet abesse: cogor abesse à te, cum quo tantoperè cupio permanere.

7. O Amor quàm absconditus, quàm ignotus es? Te cupio, Domine, nihil aliud. Præbe mihi cor tuum, et accipe meum.

8. O si possem velocissimè totam terram peragrare, et clamore valido ubique vociferari: Vivat amor Jesu Christi, vivat amor Jesu Christi!

9. O superlucida, et deliciosa Trinitas unus Deus, pasce me tuis influxibus. O simplicissimum, et jucundissimum bonum, ô bonum incommutabile, imple me teipso: transfer in te originem meam: introduce me in fundum animæ meæ!

10. O charum principium meum, quando te feliciter inveniam? quando te ardentissimè diligam? quando me totum in te rapies? quando me totum absorbabis, et sine medio tibi unies?

DECAS III.

1. Quando obdormiam, et requiescam in te, pax mea dulcissima? quando plenè aspirabit mihi Divinitatis tuæ fragantia? quando mihi exorietur dies sempiterna tuæ manifestæ visionis?

2. Per tuum cor transverberatum transfige, amantissime Jesu, cor meum jaculo amoris tui, ita ut nihil terreni continere possit, sed à solâ efficaciâ tuæ Divinitatis contineatur.

3. Ave JESU, sponse melliflue, saluto et veneror te omnium electorum tuorum affectu. Excita et rege spiritu tuo vivifico omnes motus cordis mei.

4. O amor meus et omne gaudium meum, quando inclinabitur umbra mortalitatis, et aspirabit dies æternitatis? quando depositâ sarcinâ corporis hujus cum Sanctis tuis te perenniter laudabo?

5. Recipe me, ô floride sponse, inter suavissimos amplexus amoris tui, quibus constrictus spiritus meus totus ardeat, et comburatur.

6. O bonum super omne bonum, ô finis sine fine, quando fruar te sine modo, et sine fine:

7. Pulcher es, dilecte mi, et amabilis valdè, non carni et sensui, sed animæ credenti, mundum cor habenti, et ad invisibilia se transferenti.

8. Dominus meus, et Deus meus, amem te solum propter te, et nihil amem nisi in te.

9. O suavissime Cœli splendor, adure cor meum potentissimo charitatis incendio: tibi viscera mea sacrifico, ut ea æternis flammis comburas.

10. Cupio, Domine Jesu, ut, quoties aërem ad

me attraho, te ipsum cordiali affectu intra me attraham, quatenus omnes cogitationes, verba, et opera mea tuis cogitationibus, verbis, et operibus uniantur, et sic unita Deo Patri ad majorem ejus gloriam repræsententur.

DECAS IV.

1. Da mihi, Domine, ut te videam sine formâ corporeâ, sine specie imaginariâ, sine luce creatâ. Trahe me post te extra me et extra omnes creaturas.

2. Malo, Domine, ex voluntate tuâ acerbissimas inferni pœnas sine fine tolerare, quàm sine te gaudiis perfrui sempiternis.

3. Demerge, dilectissime mi, parvulam guttam spiritus mei in immenso pelago bonitatis tuæ, demerge et absorbe me totum in abyssu infinitæ misericordiæ tuæ.

4. Veni, suspirata quies amantis animæ meæ, ut nulli mihi dies, nullæ noctes eant sine te, nullus mihi somnus sine te: tibi soli vivam, et moriar.

5. Quis ego sum, et quis es tu amor meus? Numquid non multum esset, si te permitteres à me amari? sed et insuper te amari præcipis, et mihi mortem sempiternam minaris, si te non amo.

6. Clementissime Pater, sicut tu ab omni æternitate voluisti, antequàm ego essem, ita fiat: charior est enim mihi tua gravissima voluntas, quàm operandi libertas.

7. Quando me lætificabis in regno tuo, Domine Deus meus, clarissimo vultu tuo? Quando omnia, quæ credo, lego, et audio de te, et gloria tua clarè et intuitivè videbo?

8. Sileat ante te omnis creatura, Deus meus : Tu solus mihi loquaris, adsis, et illumines, qui es omnia in omnibus; et super omnia amabilis, et gloriosus.

9. Vulnere cor meum tam potenti jaculo dilectionis tuæ, ut omnis terrena consolatio amara mihi reddatur, et omni solatio creaturarum libenter caream.

10. Extingue, Domine, omnes extraneas imagines in corde meo, ut pacem nullibi, sive delectationem vel quæram, vel inveniam, nisi in te, dulcissime Deus meus.

DECAS V.

1. O charitas, Deus meus, fac me obsecro unum tecum, sicut tu, et Pater unum estis, et sufficit mihi.

2. Utinam, suavissime Jesu, ea flamma amoris arderem, qua ardent Seraphim, qua ardet Mater tua, qua ardes tu.

3. O si possem ab omnium cordibus amorem, qui non est tuus, evellere, et tuum inserere, ut amore tuo omnes arderent, et languerent!

4. Amo te Deus meus, quia Deus es. Amo te æternitas mea, quia æternus es. Amo te immensitas mea, quia immensus es.

5. In amoris signum gratulor tibi, Deus meus, divinitatem tuam, simplicitatem tuam, æternitatem tuam, omnesque tuas perfectiones, quæ ita sunt in te, ut idem sint, quod tu.

6. Utinam omnia, quæ cogitavi, quæ sum locutus, et operatus, ex puro tui amore semper fuissent! Utinam te semper amassem!

7. O si possem, Deus meus, retrovertere annos meos, et peractæ ætatis spatia amoris tui actibus replere! ò si te semper dilexissem, cum alia extra te dilexi!

8. Nihilum mei præcessit me à diebus æternitatis tuæ, Deus æterne! nunc verò exulto tibi factori meo, et cupio annihilari quidquid in me terrenum est, ut tu solus vivas in me.

9. O æternitas quàm clarè lucet, quàm blandè, quàm præcisè, quàm in puncto! A te secedo à mundo isto sensibili: in te meum solatium, et recreatio est post negotia vitæ humanæ, post tædium vitæ labentis.

10. Tu desiderium collium æternorum, dulcissime Jesu: tu desideratus cunctis gentibus; tu sponsus, tu rex cordium: tu amor meus, et omne bonum meum.

DECAS VI.

1. Tu scis Domine, quia, si possem, omnem tibi laudem, gloriam, et honorem tribuerem, quibus te laudant, glorificant, et honorant omnes Angeli, et electi tui; sed quia impotens ad hoc sum, suscipe saltem desiderium meum, et bonam voluntatem.

2. Exclude à me, Deus, omnia impedimenta gloriæ tuæ, et in eo statu me constitue, quem aptiorem fore nosti, ut major tibi gloria ex me proveniat.

3. Possideam te in medio cordis mei, beatitudo sempiterna! possideam te, summa dulcedo animæ meæ!

4. Me tibi resigno, creator meus, purè propter

te ad omnia officia, loca, casus, eventus, statumque animæ, et corporis, qui tibi placuerit.

5. Nihil à te peto, Domine, nihil volo, nisi pro majori gloriâ tuâ. Quòd si per ignorantiam, vel errorem aliud peterem, nolo exaudiri.

6. Si tibi æquale præstatur obsequium; malo, Domine, desolationem, quàm consolationem, ut pro tui amore aliquid patiar internæ afflictionis.

7. Quia sine te nihil possum pati pro te, da mihi multam et magnam gratiam, ut multa et magna patiar pro amore tuo.

8. Major es omni laude, Deus meus; et ob id gaudeo, quia, quidquid obsequii omnes puræ creaturæ præstare tibi quocumque modo conantur, longissimè impar est dignitati et magnitudini tuæ.

9. Quidquid virtutum, piorum actuum, et affectuum in libris editis, et edendis describitur, quidquid fieri potest tibi gratum, et acceptum, id omne approbo, et volo, et cum gratia tua perficere cupio.

10. Utinam possem, Deus meus, aliquid hoc momento efficere, quod summè tibi placeat. En hoc, quod nunc aggredior, purè ad hoc dirigo, ut maximam in eo habeas complacentiam.

DECAS VII.

1. Quæso te, Domine, ne patiaris quidquam in me, quod non sit usquequaque tuum, et divinum; et si quid est, illud protinus evelle.

2. Si scirem, Deus meus, me fore annihilandum, adhuc tibi omni studio servirem; non enim tibi servio propter me, sed propter te,

3. Da, bone Jesu, ut oratio illa tua suam vim in me habeat, ut sicut tu in Patre, et Pater in te est; ita ego tecum unus sim voluntate, amore, opere, moribus, et vita.

4. Extingue me, Domine, in corde omnium hominum; et cunctos homines in corde meo occide, ut mihi mundus crucifixus sit, et ego mundo.

5. Mitte mihi, Deus, quamcumque vulneris afflictionem, et crucem; et in omni tribulatione præsta, ut reum me fatear, et cognoscam, et ut meipsum contemnam.

6. Hactenùs quosdam amavi, qui me non amabant; jam te amabo, amator æternæ, qui me amasti, antequàm te novissem; quem amare virtus summa est, à quo amari felicitas.

7. De profundis cordis mei clamo ad te, suavissime Deus, ut auferas à me vanissimum amorem corporeæ pulchritudinis, et me totum transferas ad purissimum amorem decoris tui.

8. Illabere, precor te, in penetralia cordis mei, et imprime mihi servo tuo dulcissimam, et admirabilem speciem tuam, ut quiescam in suavitate præsentia tuæ.

9. Veni, Domine, amor meus, gaudium meum, et corona mea: veni et noli amplius tardare, ne ex nimio desiderio sine sensu efficiar.

10. Scribe, dulcis Jesu, nomen tuum in corde meo; et amorem tuum mellifluum per jugem memoriam pectori meo inscribe.

DECAS VIII.

1. Vincat nequitiam meam, Domine, immensa bonitas tua, et imaginem tuam in me recognosce, quamvis deturpatam.

2. Revertor ad te, felicissimum principium meum, dulcis origo et finis meus: esto deinceps totum, ac solum cogitationum mearum objectum.

3. O unum divinum, te solum desiderat cor meum, libera me ab omni multiplicitate.

4. Diligam te, Deus, pro dono tuo, et pro modo meo, exiguo quidem, et minus justo; sed non possum ultra quam possum: potero autem plus, cum plus donare dignaberis, nunquam tamen pro ut dignus haberis.

5. O quam beati sunt illi, qui edunt, et bibunt ad mensam tuam in regno tuo, quoniam te ardentem diligunt, et te fruuntur in lætitiâ et exultatione. Ego autem hinc fame pereo; et projectus in cinere et caligine, lumen cœli non video.

6. Sitio te clarè cognoscere, esurio te perfectè diligere, nec desiderium meum adipisci valeo. Obsecro, Domine, si inveni gratiam in oculis tuis, ostende mihi faciem tuam.

7. Fac mihi, Domine, quodcumque placitum fuerit in conspectu tuo: in manibus tuis ego sum, et corpus meum, et spiritus meus: quocumque pervernero laudabo te, et exultabo vehementer.

8. Satia animam meam ad te suspirantem, felicitas mea, et reple esurientem bonis tuis.

9. Dejiciantur, quæso, omnia simulacra de throno

gloriæ tuæ, ut tu sis solus regnans in corde meo, nec sim ego ampliùs miserabiliter instabilis, et fugitivus à te.

10. Uniat me sibi verbum Dei, gignat seipsam in me sine intermissione æterna sapientia, et pro minimo mihi erit, si me despiciant cœlum et terra, et omnia quæ in eis sunt. Quod si me repuleris ab osculo tuo, non poterunt me omnia, quæ infra te sunt, consolari.

DECAS IX.

1. Veni gaudium meum, lumen oculorum meorum: veni amor meus, lux incomprehensibilis, imple omnes potentias animæ meæ intus, et foris, ut nihil nisi te videam, cogitem, amem, et desiderem.

2. Tu dixisti, Domine, Ducam eam in solitudinem, et ibi loquar ad cor ejus. Et quid aliud est solitudo, nisi te solum amare, in te solo quiescere?

3. O divina solitudo tam concupiscenti animo desiderata, quando fiet istud, ut in te omninò quiescam?

4. Heu me, quia non diligo te, vita animæ meæ, nam si verè te diligerem, semper te in corde haberem; scriptum est enim, Ubi est thesaurus tuus, ibi est et cor tuum.

5. Congrega nos in unum, potentissime amator; data est enim tibi omnis potestas in cœlo, et in terra.

6. Trahe me post te, suavissime Redemptor, qui dixisti, si exaltatus fuero à terra, omnia traham ad me ipsum.

7. Accende cor meum igne tuo, Deus meus; tu

enim ignis comburens es, et facis ministros tuos ignem urentem.

8. Deus meus es tu, qui infinita tua bonitate locupletissimus, nec honorum meorum, nec alterius cujusque rei indigentiam habere potes. Et in hoc gaudeo et exulto, quod nulla tibi perfectio, nec quidem per imaginationem adjungi possit.

9. Domine JESUS, quantum te diligunt, qui te noverunt; Pater tuus te diligit, Spiritus sanctus te diligit; omnes Angeli, omnes Electi, et amici tui amore tuo exardescunt; et ego solus frigidus ero?

10. Libera me, Deus, à multiloquio, quod patior intus in anima mea: non enim cogitationibus taceo, etiam si vocibus taceam. Multæ sunt cogitationes meæ quales tu nosti, cogitationes hominum, quoniam vanæ sunt. Da mihi eis non consentire, nec immorari, ne me impediatur ab amore tuo.

DECAS X.

1. O Amor, quam parum cognosceris, et amarissimum! Accede ad me, ô Amor, et si nullibi requiem invenis, te totum transfunde in me, æternæ et suavissime Amor.

2. Semper ardeat ignis amoris tui in altari cordis mei, et in tantum crescat incendium, ut non solum sacrificium, sed et ipsum altare comburet, et consumet.

3. Nihil me lætificet, Domine Jesu Christe, nisi tu: nihil me contristet, nisi culpa mea, et offensio tuæ Majestatis.

4. Tu es unicūm desiderium meum, æterna Sa-

pietia, tu thesaurus quem quæro, tu beatitudo ad quam suspiro.

5. Quam pulcher es, dilecte mi, quam speciosus in deliciis tuis! Utinam potentissimus amor tuus omnem extraneum amorem in me occidat. Quidquid videro, quidquid audiero, quidquid sensero; tu solus intres, et possideas cor meum.

6. O Amor potentissime, qui lutum transfiguratur in Deum, transforma me totum in te. Nimis saxeam est cor meum, nisi molliatur sanguine tuo: nimis distractum est, nisi colligatur in latere tuo.

7. O æterna veritas, et vera charitas, et chara æternitas. Tu es Deus meus, ad te suspiro die ac nocte. Te amo, te diligo et magis amare desidero: percussisti enim cor meum verbo tuo, ut amarem te.

8. Quid amore dulcius? quid securius? quid suavius? Quare sagittis ejus non est transfixum cor meum? Ergone amor tuus circumdat me undique, et nescio quid sit amor? cur sic maneo insensibilis? cur me magis attraxit creatura, quam creator?

9. Venustissime Jesu, vita mea perennis, per quam vivo, et sine qua morior, vita dulcis, et amabilis; concede ut tibi jungar, te complectar, et suavi charitate soporatus in te obdormiam.

10. Quando te videbo, dulcissime Deus? quando apparebo antè faciem tuam? quando transibo in admirabilem domum tuam? quando videbo te in terra viventium? In ista enim terra jumentorum mortalibus oculis videri non potes, sed in regione Angelorum videbimus te, sicuti es.